

四庫全書

集部

欽定四庫全書

集部

宋詩紀事卷八十六至八十八

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣朱圻

謄錄監生臣汪緣

欽定四庫全書

宋詩紀事卷八十六

錢塘厲鶚撰

錢俶

俶字文德吳越武肅王鏐孫文穆王元瓘子大將胡進思等廢忠遜王侑立之建隆元年授天下兵馬大元帥太平興國三年詔俶來朝納土歸京師封許王徙封鄧王薨追封秦國王謚忠懿有詩數百首號政本集

宮中作

廊廡周遭翠幙遮禁林深處絕喧譁
界開日影憐窗紙穿破苔痕惡
筍芽西第晚宜供露茗小池寒欲結冰花
謝公未是深沈量猶把輸贏局上誇

汝帖

李煜

煜字重光初名從嘉南唐元宗李璟第六子諸
兄早亡以次為嗣在偽位十有五年歸宋封違
命侯授左千牛衛上將軍太宗登極改封隴西公

太平興國三年薨追封吳王以王禮葬洛京之

北邙山有集

五朝故事李後主時建康市中染肆之旁多題
曰天水碧尋而皇家蕩平之悉前兆也天水碧
因煜之內人染碧夕露于中庭為露所染其色
特好遂名之

石林燕語太祖嘗因曲宴使煜誦其得意詩遂
舉詠扇揖讓月在手動搖風滿懷以對太祖曰
好一箇翰林學士

西清詩話藝祖言李煜若以作詩工夫治國事
豈為吾虜也

送鄧王二十弟牧宣城

且維輕舸更遲遲別酒重傾惜解攜浩浪侵愁光蕩漾
亂山凝恨色高低君馳檣楫情何極我凭闌干日向西
咫尺煙江幾多地不須懷抱重淒淒

馬令南唐書王名從益出鎮宣州後主率近臣
錢綺霞閣賦詩自為序其畧云秋山滴翠暮壑
澄空愛公此行暢乎遐覽

漁父詞

浪花有意千里雪桃花無言一隊春一壺酒一竿鱗世
上如儂有幾人

一棹春風一葉舟
一輪繭縷一輕鉤
花滿渚酒滿甌
萬頃波中得自由

古今詩話

悼周后

又見桐花發舊枝
一樓煙雨暮淒淒
凭闌惆悵人誰會
不覺潸然淚眼低

層城無復見嬌姿
佳節纏哀不自持
空有當年舊煙月
芙蓉池上哭蛾眉

嘗與周后移植梅花于瑤光殿之西及花時而后

已殂因成詩見意

殷勤移植地曲檻小欄邊共約重芳日還憂不盛妍阻
風開步障乘月澆寒泉誰料花前後蛾眉却不全

失却烟花主東君自不知清香更何用猶發去年枝

書靈筵手巾

浮生苦憔悴壯歲失嬋娟汗手遺香漬痕眉染黛烟

書琵琶背

旣自肩如削難勝數縷條天香留鳳尾餘煖在檀槽

馬令南唐書後主昭惠后周氏大司徒宗之女甫十九歲歸于王宮通書史善音律尤工琵琶元宗賞其藝取所御琵琶時謂之燒槽者賜馬後主即位冊為國后後主嘗演念家山破后復作邀醉舞恨來遲新破皆行于時季子仲宣后尤鍾愛忽暴疾卒后病遂亟以元宗所賜琵琶及嘗臂玉環親遺後主沐浴正妝自內舍玉珎于瑤光殿之西室享年二十九後主哀苦骨立杖而後起每于花朝月夕無不傷懷觸物寓意多為詩云云

悼幼子瑞保

永念難消釋孤懷痛自嗟
雨深秋寂寞愁引病增加
咽絕風前思昏朦眼上花
空王應念我窮子正迷家

馬令南唐書宣城公仲宣後主子也小字瑞保
三歲讀孝經若成誦然聞奏樂輒審音調宮中
燕侍頗合禮度出見士大夫改容顧揖如成人
禮乾德二年卒年四歲始封宣城公追贈岐王
諡懷獻時昭惠病劇後主恐重傷其意默坐飲
泣因為詩以寫志吟咏數四左右為之泣下

宣城公挽辭

珠碎眼前珍花凋世外春
未銷心裏恨又失掌中身
玉筍猶殘藥香匳已染塵
前哀將後感無淚可霑巾
豔質同芳樹浮危道畧同
正悲春落實又苦雨傷叢穠
麗今何在飄零事已空
沈沈無問處千載謝東風

馬令南唐書昭惠先病聞仲宣死哀苦增劇遂至于殂故後主并其母子悼之

歸宋渡江作

江南江北舊家鄉三十年來夢一場
吳苑宮闈今冷落廣陵臺殿已荒涼
雲籠遠岫愁千片雨打歸舟淚萬行
兄弟四人三百口不堪閒坐細思量

病中感懷

憔悴年來甚蕭條益自傷
風威侵病骨雨氣咽愁腸
夜鼎唯煎藥朝髭半染霜
前緣竟何似誰與問空王

以上馬令

南唐書

詠柳書黃羅扇賜慶奴

風情漸老見春羞到處銷魂感舊游
多謝長條似相識
強垂烟態拂人頭

邵博聞見後錄南唐李侯攝襟書宮人慶奴扇云
云蓉塘詩話茶所雜錄云此後主歸命後所作

病中書事

病身堅固道情深
宴坐清香思自任
月照靜居唯擣藥
門扃幽院只來禽
庸醫嬾聽詞何取
小婢將行力未禁

賴向空門知氣味不然煩惱萬塗侵

方虛谷云李後主號能詩詞集中多有病詩憔悴衰頹似貧士大夫宜其亡也

秋鶯

殘鶯何事不知秋橫過幽林尚獨游老舌百般傾耳聽
深黃一點入烟流棲遲背世同悲魯瀏亮如笙碎在縹
莫更留連好歸去露華淒冷蓼花愁

以上唐音戊籤

題金樓子後

并序

梁孝元謂王仲宣昔在荊州著書數十篇荊州壞盡

焚其書今在者一篇知名之士咸重之見虎一毛不
知其斑後西魏破江陵帝亦盡焚其書曰文武之道
今夜盡矣何荊州壞焚書二語先後一轍也詩以慨
之

牙籤萬軸裹紅綃王粲書同付火燒不是祖龍留面目
遺篇那得到今朝

楓窗小牘云此詩同書藏內庫今朝字誤作金
朝徽廟惡而抹之後竟如識入金

句

鶯狂應有恨，蜨舞已無多。

老學菴筆記後主作此未幾亡國

人生不滿百，剛作千年畫。

野客叢書

鬢從近日添，新白菊

是去年依舊黃。

任淵陳后山詩注

李從善

從善字子師，元宗第七子，封韓王，入宋改封楚

國公。

陸游南唐書韓王從善因留京師，後主手疏求歸國，太祖不許。後主素友愛，每憑高北望泣下。

霑襟由是歲時游燕多罷不講常製却登高文
揮塵後錄王景彝故第在京師太子巷初開寶
間江南後主遣其弟從善入貢留不遣建宅以
賜故都人猶以太子目之也

薔薇一首十八韻呈東海侍郎徐鉉

綠影覆幽池芳菲四月時管弦朝夕興組繡百千枝
盛引牆看徧高煩架屢移露輕濡綵筆遽誤拂吟髭
日照玲瓏幔風搖翡翠帷早紅飄薜地狂蔓挂蛛絲
嫩刺牽衣細新條窄草垂晚香難暫捨嬌態自相窺
深淺分前後榮華互盛衰尊前留客久月下欲歸遲
何處繁臨砌

誰家密映籬絳羅房燦爛碧玉葉參差分得殷勤種開
來遠近知晶熒歌袖袂柔弱舞腰支膏麝誰將比庭萱
自合嗤勻妝低水鑑泣淚滴煙靄畫擬憑梁廣名還亞
楚姬寄君十八韻詩拙媿新奇

全唐詩

李從謙

從謙元宗第九子後主母弟也風采峭整喜為
律詩動有規誨封吉王宋改封鄂國公

觀碁

竹林二君子盡日竟沈吟相對終無語爭先各有心恃
強斯有失守分固無侵若算機籌處滄滄海未深

馬令南唐書後主燕閒與侍臣奕從謙時數載
侍側命賦觀棊詩云云歎賞久之

孟昶

昶字保元後蜀高祖第三子嗣偽位三十二年
宋師破成都納降歸于汴京封開府儀同三司
檢校太師兼中書令秦國公乾德三年薨冊贈
尚書令追封楚王謚恭孝

避暑摩訶池上作

冰肌玉骨清無汗水殿風來暗香滿簾開明月獨窺人
欹枕釵橫雲鬢亂起來瓊戶寂無聲時見疎星渡河漢
屈指西風幾時來不道流年暗中換

漫叟詩話錢唐有一老尼能誦後主詩云云
東坡洞仙歌序云僕七歲見眉州老尼姓宋忘
其名自言嘗隨其師入蜀主孟昶宮中一日大
熱蜀主與花藥夫人夜起避暑摩訶池上作此
詞具能記之

句

新年納餘慶嘉節號長春

蜀檇杙蜀未亡前一年歲除日昶令學士幸寅
遜題桃符版于寢門以其詞非工昶命筆自題
云云蜀平朝廷以呂餘慶知成都長春乃太祖
誕聖節名也其符合如此

宋詩紀事卷八十六

欽定四庫全書

宋詩紀事卷八十七

錢塘厲鶚撰

楊朴妻

送夫赴召

更休落魄耽杯酒且莫猖狂愛詠詩今日捉將官裏去
這回斷送老頭皮

東坡志林真宗東封還訪天下隱者得杞人楊
朴能為詩召對自言不能上問臨行有人作詩
送卿否朴曰惟臣妻有一首云云上大笑故還
山命其子一官就養

舊桃

舊桃寇萊公妾

呈寇公

一曲清歌一束綾
美人猶自意嫌輕
不知織女螢窗下
幾度拋梭織得成

風勁衣單手屢呵
幽窗軋軋度寒梭
臘天日短不盈尺
何似妖姬一曲歌

侍兒小名錄拾遺萊公因會贈歌姬以一束綾
舊桃作詩呈公

劉元載妻

歷代吟譜孫冕三英集序云三英者三哲婦之詞也世有男子大誇篇詠而意隨語盡者滔滔皆然三英婦德天賦若此忍不序而竭之乎詩話總龜天聖中禮部尚書孫冕序三英集劉元載妻詹光茂妻趙晟之母早梅寄遠惜別三詩劉妻哀子無立詹妻留夫侍母病趙母懼子遠游孫公愛其才以取之

早梅

南枝向暖北枝寒一種春風有兩般憑仗高樓莫吹笛

大家留取倚闌干

歷代吟譜

詹光茂妻

寄遠

錦江江上探春回，銷盡寒冰落盡梅。
爭得兒夫似春色，

一年一度一歸來。

歷代吟譜

趙晟母

惜別

暖有花枝冷有冰，佳人後會却無憑。
預愁離別苦相對，

挑盡漁陽一夜燈。

歷代吟譜

謝希孟

希孟字母儀晉江人景山之妹嫁陳安國早卒

歐陽公序云希孟之詩尤隱約深厚守禮而不自啟有古幽閑淑女之風非特婦人之能言也

詠芍藥

好是一時豔本無千歲期所以謔相贈載之在聲詩

句

為花雖可期論德亦終鮮

牡丹

句牽主人衣一步行不得

薔薇

薰薰麝臍烈灼灼程血殷

躑躅

樹既摧為薪花亦落為

塵

凌霄

霄豔陽一何好零落千載冤

朱槿

盜者得其便掉頭笑

且歌

曼陀羅花

卞子真賞關莊生夢還怯

蝴蝶花

以上歷代吟譜

許氏

許氏虞部之女方勉妻

夫犯夜禁代呈郡守鄭毅夫

明時樂事娛詩酒帝里風光剩占春
况是白衣重得侶不堪青旆自招人
早知玉漏催三鼓肯把金貂換百巡
大抵仁人憐氣類免教孤客作囚身

詩話總龜

句

匣劍未磨晁錯血已聞刺客殺袁絲

讀晁錯傳

彤管

徐氏

徐氏侍從宥之女吳丞相妻

偶題

絮吹柳陌三春雨花落梨園一笛風百尺玉樓簾半捲

夜深人在水晶宮

墨莊漫錄

錢氏

錢氏封南宮縣君

絕句

士悲秋色女懷春此語由來未是真儻若有情相眷戀
四時天氣總愁人

侯鯖錄

王氏

王氏名文淑荆公之妹張奎妻封長安縣君

按

墨莊漫錄作荆公女適吳丞相之子封長安縣君誤今從隱居詩話改正

隱居詩話張奎妻長安縣君荆公之妹也佳句為最其云草草杯盤供笑語昏昏燈火話平生

荆公妻吳國夫人亦能文嘗有小詞約諸親游西湖有云侍得明年重把酒攜手那知無雨又無風脫灑可喜

戲詠白羅繫髻

香羅如雪縷新裁
惹住烏雲不放回
還似遠山秋水際
夜來吹散一枝梅

墨莊漫錄

李氏

李氏建昌人公擇之姊
江西洪亶郎中妻封文

城縣君

挽兄公擇尚書

久歷金門貴未酬黃屋知如聞天祿客抱恨作銘詩

皇朝

類苑

王氏

王氏荆公女吳安持妻封蓬萊縣君

李壁王荆文公詩注介父二女長適吳安持寶文閣待制次適蔡卞

寄父

西風不入小窗紗秋意應憐我憶家極目江山千萬恨

依然和淚看黃花

冷齋夜話

李樗大夫妻

文獻通考李樗有毛詩詳解三十六卷陳氏曰樗閨之名儒于林少穎為外兄

謝魏國范夫人

朝來瑞靄徧祥虛
果見麻姑降陋居
陶令滿籬唯有菊
相如四壁但藏書
蕭條庭館門羅雀
冷落杯盤食欠魚

缺後二句

過庭錄

王氏

王氏平甫女劉天保妻

句

不緣燕子穿簾幕春去秋來那得知

隱居詩話

李珣

珣字溫叔都官員外郎某之幼女八歲能詩適

王常汎舟江湖溺死

榴花

烈火真紅輕皺面晨霞碎翦貼枝條金刀刺出猩猩血

濺落芳叢久不銷

翰府名談

魏夫人

魏夫人襄陽人道輔之姊曾子宣丞相之妻

句

使君自為君恩厚不是區區愛華山

老學菴筆記曾子宣丞相元豐間帥慶州召還往來潼關夫人魏氏作詩戲之云

女郎曹希蘊

贈乾明寺繡尼集句

睡起楊花滿繡牀。為他人作嫁衣裳。因過竹院逢僧話。

始覺空門氣味長。

楊公彥齡筆錄

新月

禁鼓初聞第一敲。乍看新月出林梢。誰家寶鏡新磨出。
匣小參差蓋不交。

桐江詩話女郎曹希蘊貨詩都下有人以敲梢
交為韻索賦新月詩曹賦云云夢多遜之句也

句

記得小軒岑寂夜。月移疎影上東牆。

漫叟詩話希蘊詩雖格韻不高時有巧語嘗作
墨竹詩云云此語最工

賀方回妹

寄賀方回

獨倚危闌淚滿襟
小園春色嬾追尋
深恩縱似丁香結
難展芭蕉一寸心

能改齋漫錄方回卷一妹別久妹寄詩云云賀
因所寄詩成柳色黃詞云薄雨催寒斜照弄晴
春意空闊長亭柳色纔黃遠客一枝先折烟橫
水際映帶幾點歸鴉東風消盡龍沙雪還記出
門時恰而今時節將發畫樓芳酒紅淚清歌頓
成輕別已是經年杳杳音塵都絕欲知方寸共

有幾許清愁芭蕉不展丁香結枉望斷天涯兩
厭厭風月

丁渥妻

寄外

淚濕香羅帕臨風不肯乾欲憑西去鴈寄與薄情看

雲齊廣錄進士丁渥在太學夢歸家見妻于燈
下披箋握管為書寄生生曰我已至矣何用書
為妻但揮涕而不答又于別幅見詩云云生既
覺以語同舍客客曰君思念之極以至于此後
旬日得書并詩皆夢中所見無少差矣

并門徐帥屬內子

句

幕中舞客呈鸛鵒帳下牙兵困疾梨

和韻幕中有醉起舞者

華

袞自宜還舊物繡衣先見冠同寮

和韻送屬官除監司故相家也

耆舊續聞并門徐帥屬肉子能詩林子中為帥每首唱徐密寫歸衆方操觚肉子詩已來必有可觀

陳氏

陳氏述古女適李氏

題小鴈屏

紅蓼淡蘆欹曲水幾雙容與對西風扁舟阻向江鄉去
却喜相逢一枕中

曲屏誰畫小瀟湘鴈落秋風蓼半黃雲淡雨疎孤嶼遠
泠泠清夢到高唐

者舊續聞陳述古女適李氏從夫仕晉寧軍判
官部使者以小鴈屏求詩自作黃魯直小楷題
其上云

謝氏

謝氏王元甫妻

送外

此去唯宜早早還休教重起望夫山君看湘水祠前竹

不是男兒淚染斑

青瑣高議

高氏

高氏淮南士大夫妻

暮春感懷

楊花日日長無定海燕年年却有歸一瞬青春疾如電

等閒著盡縷金衣

歷代吟譜

盧氏

句

田舍輓轡出短牆村落鞦韆挂高樹

寒食

歷代吟譜

葉桂女

桂女字月流

琵琶亭

樂天當日最多情淚滴青衫酒重傾明月滿船無處問

不聞商女琵琶聲

中山詩話

李氏女

李氏女毘陵人

詠破鏡 十六歲作

半輪殘月掩塵埃，依稀猶有開元字。想得清光未破時，

買盡人間不平事。

墨客揮犀

鮑娘

題兌溪驛

谿驛舊名多，烟光滿翠嵐。須知今夜好，宿處是江南。

清波雜誌衛信間驛名兌溪謂其水作三道來
作多字形鮑娘題詩蔣穎叔和之

暨氏女

暨氏女建安人

句

多情樵牧頻簪首無主蜂鶯任宿房

春渚紀聞建安暨氏女子十歲能詩賦野花云
云觀者雖加驚賞而知其後不保貞素竟更數
夫流落而終

王氏

王氏趙德麟妻

絕句

白藕作花風已秋不堪殘睡更回頭
晚雲帶雨歸飛急
去作西窗一夜愁

茗溪漁隱叢話此趙德麟細君作也德麟既鰥居因見此篇遂與之為親余以為此二十八字媒也

張氏

張氏芸叟女司馬朴妻

句

莫訝淚頻滴都緣心未灰
滿目烟含芳草綠倚闌露

泣海棠紅

墨莊漫錄芸叟久經遷謫快快不平嘗內集分
題賦詩其女得蠟燭有句云云浮休有慚色司
馬朴之室芸叟女也廊延路上寺中一聯云云
或者便是詠燭者

王氏

王氏曹組之母兄弟幼孤王氏教養成就

雪中觀妓

梁王宴罷下瑤臺窄窄紅韉步雪來恰是陽春三月暮

楊花飛處牡丹開

桐江詩話

陳氏

陳氏蜀人唐暨妻

送張邦基母

念別每驚魂流年多病身惟我延陵子情真意更親分
攜無淚盡望遠起愁新老眼將何暖音書不厭頻

雪意亂江雲江梅漸放春雁歸人去後愁與歲華新榮

路君方振園居我豈貧惟餘憂我念相憶莫霑巾

墨莊漫錄唐暨潛亨質肅公猶子余母之舅也
隱居襄陽著周公政典以周官定臧否鄒志完
為序娶陳氏蜀人令德純茂尤工文章大觀中
先君為郡學官代還以詩送別余母云云

丘氏

丘氏朝奉郎邱舜中女諸女皆能文詞每兄弟
內集必聯詠為樂

寄外

簾裏孤燈覺曉遲獨眠留得宿妝眉珊瑚枕上驚殘夢

認得蕭郎馬過時

西清詩話

周仲美

題郵亭壁

世居京師父游宦家于成都既而適李氏子侍舅姑
宦泗上從良人赴金陵幕偶因事棄官入華山有長
往之意仲美即寄身合肥外祖家方求歸未得會舅
遽調任長沙不免共載而南雲水茫茫去國益遠形
影相弔灑涕何言因書所懷于壁

愛妾不愛子為問此何理棄官更棄妻人情寧可已永
訣泗之濱遺言空在耳三載無朝昏孤幃淚如洗婦人
義從夫一節誓生死江鄉感殘春腸斷晚烟起西望太
華峯不知幾千里

王直方詩話

郭暉妻

荅外

碧紗窗下啟緘封尺紙從頭徹尾空應是仙郎懷別恨
憶人全在不言中

葉夢得崖下放言士人郭暉因寄妻問誤封一
白紙去細君得之乃寄一絕云

秦少游女

句

眼前雖有還鄉路馬上曾無放我情

靖康間題壁
礪詩話

梅

李清照

清照號易安居士濟南人格非之女趙挺之之
子明誠妻其母王狀元拱辰女亦工文章清照
晚節不終再適張汝舟流落江湖間卒有漱玉

集

朱子游藝論本朝婦人能文只有李易安與魏夫人李有詩大畧云兩漢本繼紹新室如贅疣所以嵇中散至死薄殷周中散非湯武得國引之以比王莽如此等語豈女子所能

茗溪漁隱叢話易安再適張汝舟未幾反目有啟事與綦處厚云猥以桑榆之晚景配茲駟僮之下材傳者無不笑之

雲麓漫抄易安投翰林學士綦崇禮啟清照啟素習義方鹿明詩禮近因疾病欲至膏肓牛蟻不分灰釘已具嘗藥雖存弱弟應門惟有老兵既爾蒼皇因成造次信彼如簧之說惑茲似錦之言弟既可欺持官文書來輒信身幾欲死非玉鏡架亦安知飽餽難言優柔莫決呻吟未定強以同歸視聽才分實難共處猥以桑榆之晚

景配茲駟僧之下才身既懷吳之可嫌惟求脫
去彼素抱壁之將往決欲殺之遂肆侵凌日加
毆擊可念劉伶之助難勝石勒之拳局地扣天
敢效談娘之善訴升堂入室素非李赤之甘心
外援難求自陳何害豈期末事適得上聞取自
宸衷付之廷尉被桎梏而置對同凶醜以陳詞
豈惟賈生羞絳灌為儕何啻老子與韓非同傳
但祈脫死莫望償金友凶橫者十旬蓋非天降
居囹圄者九日豈是人為抵雀捐金利當安往
將頭碎壁失固可知實自繆愚分知獄市此蓋
伏遇內翰承旨搢紳望族冠蓋清流日下無雙
人間第一奉天克復本緣陸贄之詞淮蔡底平
實以會昌之詔哀憐無告雖未解驂感戴鴻恩
如真出已故茲白首得免丹書清照敢不省過
知慚捫心識媿責全責智已難逃萬世之譏敗
德敗名何以見中朝之士雖南山之竹豈能窮

多口之談惟智者之言可以止無根之謗高鵬
尺鷃本異升沈火鼠冰蠶難同嗜好達者共惜
童子皆知願賜品題與加湔洗誓當布衣蔬食
溫故知新再見江山依舊一瓶一鉢重歸畝畝
更須三沐三薰忝在葭莩敢茲塵瀆
清波雜志頃見易安族人言明誠在建康日易
安每值天大雪即頂笠披蓑循城遠覽以尋詩
得句必邀其夫賡和明誠每苦之也
四六談麈唐人祭文多用四六雖韓退之亦然
故李易安祭趙湖州文曰白日正中歎龐公之
機捷堅城自墮憐杞婦之悲深婦人四六之工
者

琅嬛記李易安賀人學生啟中有云無午未二
時之分有伯仲兩楷之侶既繫臂而繫足實難
弟而難兄玉刻雙璋錦挑對襟注曰任文二子
學生德卿生于午道卿生于未張伯楷仲楷兄

弟形狀無二白沒兄弟母不能辨以五綵繩一繫于臂一繫于足

上樞密韓公工部尚書胡公

并序

紹興癸丑五月兩公使金通兩宮也易安父祖出韓公門下見此大號令不能忘言作詩各一章以寄意以待采詩者云

三年夏六月天子視朝久凝旒望南雲垂衣思北狩如聞帝若曰岳牧與羣后賢寧無半千運已過陽九勿勒燕然銘勿種金城柳豈無純孝臣識此霜露悲何必羹

捨肉便可車載脂土地非所惜玉帛如塵泥誰當可將
命幣厚辭益卑四岳僉曰俞臣下帝所知中朝第一人
春官有昌黎身為百夫特行足萬人師嘉祐與建中為
政有臯夔漢家畏王商唐室尊子儀是時已破膽將命
公所宜公拜手稽首受命白玉墀曰臣敢辭難此亦何
等時家人安足謀妻子不必辭願奉天地靈願奉宗廟
威徑持紫泥詔直入黃龍城北人定稽顙侍子當來迎
仁君方博信狂生休請纓或取犬馬血與結天日盟

胡公清德人所難謀同德協心志安脫衣已被漢恩煥
離歌不道易水寒皇天久陰后土濕雨勢未回風勢急
車聲鱗鱗馬蕭蕭壯士懦夫俱感泣閭閻嫠婦亦何知
瀝血投書干記室葵邱踐土非荒城勿輕談士棄儒生
露布詞成馬猶倚峭函闕出雞未鳴巧匠何曾棄樗櫟
芻蕘之言或有益不乞隋珠與和璧只乞鄉闕新信息
靈光雖在應蕭條草中翁仲今何若遺氓豈尚種桑麻
敗將如聞保城郭嫠家父祖生齊魯位下名高人比數

當時稷下縱談時猶記人揮汗成雨子孫南渡今幾年
漂零遂與流人互欲將血淚寄山河去灑東山一坏土
雲麓漫抄

浯溪中興頌詩和張文潛

五十年功如電掃華清花柳咸陽草五坊供奉鬪雞兒
酒肉堆中不知老叛兵忽自天上來逆臣亦是姦雄才
勤政樓前走戎馬珠翠踏盡香塵埃何為出戰輒披靡
傳置荔枝多馬死堯功舜德本如天安用區區紀文字

著碑銘德真陋哉迺令神鬼磨山崖子儀光弼不用猜
天心悔禍人心開夏為殷鑒當深戒簡策汗青今具在
君不見當時張說最多機雖生已被姚崇賣

君不見驚人廢興傳天寶中興碑上今生草不知負國
有姦雄但說成功尊國老誰令妃子天上來號秦韓國
皆天才苑桑羯鼓玉方響春風不敢生塵埃姓名誰復
知安史健兒猛將安眠死去天尺五抱甕峯峯頭鑿出
開元字時移勢去真可哀姦人心醜深如崖西蜀萬里

尚能反南內一閉何時開可憐孝德如天大反使將軍
稱好在嗚呼奴輩乃不能道輔國用事張后尊乃能念
春薺長安作斤賣

清波雜志

曉夢

曉夢隨疎鐘飄然躡雲霞因緣安期生邂逅萼綠華秋
風正無賴吹盡玉井花共看藕如船同食棗如瓜翩翩
坐上客意妙語亦佳嘲辭鬪詭辨活火分新茶雖非助
帝功其樂何莫涯人生能如此何必故歸家起來斂衣

坐掩耳厭喧譁心知不可見念念猶咨嗟

感懷

寒窗敗几無書史公路可憐合至此青州從事孔方君
終日紛紛喜生事作詩謝絕聊閉門燕寢凝香有佳思
靜中我乃見至交烏有先生子虛子

春殘

春殘何事苦思鄉病裏梳頭眼最長梁燕語多終日在

薔薇風細一簾香

以上彤管遺編

夜發嚴灘

巨艦只緣因利往扁舟亦是為名來往來有媿先生德
特地通宵過釣臺

釣臺集

句

詩情如夜鵲三繞未能安少陵也自可憐人更待明

年試春草

以上風月堂詩話

南來尚怯吳江冷北狩應悲

易水寒南渡衣冠少王導北來消息欠劉琨

建炎初作以

上詩話雋永

楊氏

楊氏越漁者楊翁女歸謝生

與謝生聯句

珠簾半牀月青竹滿林風楊何事今宵景無人解與同

謝宮閨詩史

陸放翁妾

題壁

玉階蟋蟀鬧清夜金井梧桐辭故枝一枕淒涼眠不得

呼燈起作感秋詩

隨隱漫錄陸放翁宿驛中見題壁詩詢之驛卒
女也遂納為妾方餘半載夫人逐之妾賦卜算
子云只知眉上愁不識愁來路窗外有芭蕉陣
陣黃昏雨曉起理殘妝整頓教愁去不合畫春
山依舊留愁住

文婉

文婉溫州樂清人錢氏婦

句

霜月天邊清興遠金鐘雲裏夢魂閑

題白石山詩女史

呂氏

呂氏伯恭之祖姑封清源君

句

前身當是陶淵明愛酒不入遠公社

詩女史

韓玉父

題漢口鋪

并序

妾本秦人先大父嘗仕于朝因亂遂家錢唐幼時易安居士教以詩及笄父母以妻上舍林子建去年林

得官歸閩妾傾囊以助其行林許秋冬間遣騎迎妾
久之杳然何其食言耶不免攜女奴自錢唐而之三
山比至林已官盱江矣因而復回延平經由順昌假
道昭武而去歎客旅之可厭笑人事之多乖因理髮
漠口鋪漫題數語于壁云

南行踰萬山復入武陽路黎明與雞興理髮漠口鋪盱
江在何所極目烟水暮生平良自珍羞為浪子婦知君
非秋胡強顏且西去

彤管遺編

何師韞

師韞字季才金谿人抱甕先生天棐女嫁臨川
饒氏四十而寡所居有嬾愚樹遂榜室曰嬾愚
有詩集

自題嬾愚室

君不見南嶽嬾殘師佯狂啖殘食粥涕任垂頤嬾為俗
人拭又不見愚溪子柳子堂堂古遺直因以愚名溪于
今慕其德二子真吾師欲見不可得唯有嬾愚樹終日

對顏色齊威勤讀書輪扁巧斲輪勤巧動心志何如嬾
愚真衰年髮已皤行少坐時多亦欲傲勤巧奈此嬾愚
何

夷堅志

失假山偈

片石亡來歲月深昔時尋覓到而今元來只在家山裏
枉費工夫別處尋

撫州府志何氏喜浮屠教徧閱華嚴諸經一日偕夫往白楊山作失假山偈云云年四十孀居紹興間張魏公浚迎侍母鎮國太夫人帥閩道出界山太夫人亦通禪學聞其名踵門一見契

合呼為無生法友

汪氏

汪氏彥章女內江劉五清之配

寄良人

旅食京華歲月多聖賢事業竟如何
明年佇聽泥金報
閑把關雎獨自歌

四川總志

朱淑真

淑真號幽棲居士錢唐人世居桃村工詩嫁為

市井民妻不得志歿宛陵魏仲恭輯其詩名曰

斷腸集

傷春

覽鏡驚容却自嫌逢春長是病厭厭吹花弄粉新來嬾
惹恨供愁近日添生怕子規聲到耳苦羞雙燕語穿簾
眉頭眼底無他事須信離情一味嚴

初夏

竹搖清影罩幽窗兩兩時禽噪夕陽謝却海棠飛盡絮

困人天氣日初長

秋夜

夜久無眠秋氣清
燭花頻翦欲三更
鋪牀涼滿梧桐月
月在梧桐缺處明

馬塍

一塍芳草碧芊芊
活水穿花暗護田
蠶事正忙農事急
不知春色為誰妍

以上斷腸集

賦小鬟舞五絕

管弦催上錦茵時體態輕盈祇欲飛若使明皇當日見
阿蠻無計誑楊妃

香茵穩襯半鉤月往來凌波雲影滅弦催拍緊促將徧
兩袖翩然作回雪

抑腰不被春拘管鳳轉鸞回霞袖緩舞徹伊州力不禁
筵前撲簌花飛滿

占斷京華第一春清歌妙舞實超羣只愁到曉人星散
化作巫山一段雲

燭花影裏粉姿閒一點愁侵兩點山不怕帶他飛燕妒
無言逐拍省弓彎

西湖志餘與淑真同時有魏夫人亦能詩嘗置
酒邀淑真命小鬟隊舞因索詩以飛雪滿羣山
為韻淑真醉中援筆賦五絕云云不惟詞音豔
麗而舞態之妙亦可想見也

劉彤

彤字文美江寧章文虎妻

寄外

碧紗窗外一聲蟬牽斷愁腸嬾晝眠千里才郎歸未得

無言空撥玉爐烟

茗溪漁隱叢話

陳氏

陳氏號梅莊提刑仲微女適新昌胡縣丞有詩

集

述懷

一片愁心怯杜鵑
妝從任鬢雲偏怕
郎說起陽關意

常掩琵琶第四弦

山城落日弄昏黃
又了平生半日忙
侍妾不須燒絳蠟

讓他明月入回廊

名媛璣囊

黃淑

淑字致柔適建寧進士王防寡居後族議改適
因詠竹以見志

詠竹

勁直忠臣節孤高烈女心四時同一色霜雪不能侵

名媛

璣囊

連倩女

倩女延平人適鄰生陳彥臣

題竹簾

綠筠劈破條條直紅線經回眼眼奇為愛如花成片段

致令直節有叅差

名媛璣囊

華春娘

春娘適徐君亮

贈外

燕子樓中燕子飛片泥一點誤霑衣主人頻起嗔嫌意

垂下珠簾不放歸

彤管新編

黃氏

黃氏適福建潘用中

感懷

闌干閒倚日偏長
短笛無情苦斷腸
安得身輕如燕子

隨風容易到君傍

名媛璣囊

謝慧卿

慧卿巴縣人有閨餘集

絕句

尋得桃源可學仙
丹書唯恐鳳飛傳
雨收峯頂雲歸洞
風到池塘月滿天

四川總志

王瓊奴

瓊奴徐苕郎妻

荅外

茜色霞箋照面頰
玉郎何事太多情
風流不是無佳句
兩字相思寫不成

名媛璣囊

林杜娘

杜娘杭州新城人

遊碧沼勝居

幽谷泉聲冷鳥啼僧定深
好花叢古砌寒瀑發高岑
遊客陸鴻漸居人支道林
欲歸青嶂去臨去復沈吟

彤管
遺編

朱逸仙

寄元驤卿

郎今多病如家令
妾自拚躬怨楚王
斜壓玉釵成獨夢

低垂玄髮繫柔腸

四朝詩

金麗卿

麗卿杭州人

題廣信道中

家住錢唐山水圖梅邊柳外識林蘇平生慣占清涼國

豈料人間有暑途

古杭雜記詩集

賈蓬萊

春曉

方池水影薄曲檻鳥聲嬌
鸞鏡紅綿冷蛾眉翠黛消
冶容舒嫩萼幽思結柔條
纖指收花露輕將雪粉調

謝姊惠襪

蓮瓣娟娟遠寄將
繡羅猶帶指尖香
弓彎著上無行處
獨立花陰看鴈行

以上彤管遺編

鄧氏

寄衣

欲寄寒衣上帝都
連宵裁翦眼模糊
可憐寬窄無人試

淚逐西風灑去途

四朝詩

來氏

來氏豫章人

水仙花二首

瑤池來宴老仙家
醉倒風流萼綠華
白玉斷筭金暈頂
幻成癡絕女兒花

花盟平日不曾寒
六月曝根高處安
待得秋殘親手種

萬姬圍繞雪中看

全芳備祖

女郎張惠卿

題常山店壁

迢遞投前店，颼颼守破窗。一燈明復暗，顧影不成雙。

清波

雜誌

毛友龍妻

寄外

翦燭親封錦字書，擬憑歸鴈寄天隅。經年未報千秦策，

不識如今舌在無。

詩話總龜

沈清友

清友姑蘇女子

絕句

晚天移棹泊垂虹
閒倚蓬窗問釣翁
為底鱸魚低價賣
年來朝市怕秋風

隨隱漫錄清友一絕得風人之體又詠漁父起
家紅蓼岸傳世綠蓑衣詠牧童自便牛背穩却
笑馬蹄忙得下字之工

于本大妻

本大故姓許旌陽族也得仙術又變姓名夫婦
偕隱西山下

得仙詩

醉舞狂歌踏落花綠羅裙帶有丹砂往來城市買山藥
那箇西山是我家

宮闈詩史

楊氏婦

楊氏婦永嘉人

送夫從軍

海壇門外浪滔天
妾上城樓君上船
回首西風深巷底

梅花霜月夜如年

東甌詩集

俞氏

俞氏號菊窗

賀陳隨隱以布衣除東宮掌書

萬人海裏闢幽扉
欲學深居只布衣
不道內前車馬鬧

又催父子入宮闈

隨隱漫錄

宋氏

宋氏天台人

鬻廬

自歎年來刺骨貧，吾廬今已屬西鄰。
殷勤說與東園柳，他日相逢是路人。

趙葵行營雜錄：天台宋氏家本富，後貧，鬻廬于鄰。價成，作詩云：「云富者見詩側然，即以券還之。」亦不索其直。鄉人嘉其誼。

趙葵姬

絕句

拆聲默報早朝回滿院春風繡戶開
怪得無人理絲竹
綠陰深處摘青梅

古今女史趙葵同知樞密院朝罷歸私第而諸姬不見葵往訪之乃羣聚摘青梅有一姬善詩賦葵責令賦詩云云

韓希孟

希孟巴陵人魏公五世孫襄陽賈尚書子璦之婦年十八開慶初元兵至岳陽為卒所掠赴水越三日得其屍練帟帶中有詩

日璐按練帟帶中詩宋史與輟

耕錄不同今兩存之

練希帶詩

我質本瑚璉宗廟供蘋蘩一朝嬰禍難失身戎馬間寧
當血刃死不作衽席完漢上有王猛江南無謝安長號
赴洪流激烈摧心肝

宋史烈女傳

又

宋未有天下堅正臣禮秉開國百戰功每陣惟雄整及
侍周幼主臣心常炯炯帝曰卿北伐山戎今有警死狗

莫擊尾此行當繫頸即日辭陛下盡敵心欲逞陳橋忽
兵變不得守箕頰禪讓法堯舜民物普安靜有國三百
年仁義道馳騁未改祖宗法天胡肆大青細思天地理
中有幸不幸天果喪中原大似裂冠袷君誠不獨活臣
實無魏丙失人焉得人垂戒嘗耿耿江左無謝安塞北
有王猛所以戎馬來飛渡巴陵境大江限南北今此一
舴艋本期固封疆誰謂如畫餅烈火燎昆岡不辨金玉
礦妾本良家子性僻守孤梗嫁與尚書兒銜署紫蘭省

直以才德合不棄宿瘤癭初結合歡帶誓比日月晒鴛
鴦會雙飛比目願常並豈期金石堅化作桑榆景旄頭
熟正然蚩尤氣先屏不意風馬牛復及此燕郢一方遭
劫虜六族死俄頃退鷁落迅風孤鸞弔空影簪堅折白
玉瓶沈斷青梗一死空冥府憂心長炳炳意堅志不移
改邑不改井我本瑚璉器安肯作溺皿志節匪轉石氣
噓如吞鯁不敢燬火然願為死灰冷貪生念麴蛾乞憐
羞虎穿借此清江水葬我全首領皇天如有知定作血

面請願魂化精衛填海使成嶺 輟耕錄

節婦王氏

王氏臨海人

題清風嶺崖石

君王無道妾當灾
棄女拋男逐馬來
夫面不知何日見
此身料得幾時回
兩行清淚偷頻滴
一片愁眉鎖未開
回首故山看漸遠
存亡兩字實哀哉

東園客談至元十三年丞相巴延平宋以偏師
徇台台之臨海民婦王氏者美姿容被掠于夫

長殺其舅姑與夫而欲私之婦誓死不可自念
且被污因陽曰能俾我為舅姑與夫服期月乃
可事主君千夫長見其不難于死從所請仍使
俘婦雜守之師還挈還行至嶮過清風嶺婦仰
天竊歎曰吾知所以死矣即齧拇指出血寫口
占詩于崖石上寫畢投崖下以死死之日距今
且將八九十年石上血墳起如始寫時不為風
雨所剝蝕嶮丞謝端為之立祠

盧氏

盧氏荆門州人統制吳源妻

送夫赴襄陽

羨君家世舊纓簪百戰常懷報主心
草檄有才追記室

築臺無路繼淮陰射鵰紫塞秋雲黑走馬黃河夜雪深
白首丹衷知未變歸來雙肘印黃金

絕命詞

夫為萇弘血妾感共姜詩夫妻同死義天地一淒其

荆門紀畧源救襄陽陣歿氏聞計大慟部署家
事畢焚香泣拜曰夫死王事忠也妾敢不相從
于地下遂賦此詩自縊死

杜氏婦

北行作

江淮幼女別鄉閭好似明妃遠嫁無默默一心歸故國
區區千里逐狂夫慵拈簫管吹羌曲嬾繫羅裙舞鷓鴣
多少眼前悲泣事不如花柳舊江都

山房隨筆

英州司寇女

以下無姓名閨媛

過梅嶺題

并序

妾幼年侍父任英州司寇既代歸父以大庾本號梅
嶺今蕩然無一株遂市三十本植于嶺之左右因留
詩于寺壁今隨夫任端溪復至此嶺已為丐鰥者所

覆即命墨于故處

滇江今日掌刑回上得梅山不見梅輟俸買栽三十樹

清香留與雪中開

墨客揮犀

上庠士人妻

寄鞵鞵

細鞵弓鞵巧樣新殷勤寄與讀書人好將穩步青雲上

莫向平康漫惹塵

名媛璣囊

太學生妻

寄夫

數日相望極須知意思迷夢魂不怕險飛過大江西

合璧事類前集有書生娶後遊太學久不歸一夕夢返其家見妻秉燭寫詩書生怪而記之後家書至有詩一首如夢中所見無殊夢之夕乃發書之日

浣花女

潭畔芙蓉

芙蓉花發滿江紅盡道芙蓉勝妾容昨日妾從隄上過

如何人不看芙蓉

顧氏積書巖選

無名女子

永安驛題柱

無人解妾心
日夜長如醉
妾不是瓊奴
意與瓊奴會
媛名璣囊

崖州女子

詠花扇

團扇畫方新
金花照席茵
那緣燈下見
更值月中人
朝

詩

無名女子

靖康間題鄧州南陽驛壁

流落南來自可嗟
避人不敢御鉛華
却思當日鶯鶯事
獨立東風霧鬢斜

陶朱新錄

無名婦人

句

蚌胎光透殼
犀角暈盈尖

詠月

許彥周詩話

鄱陽婦人

建炎初題黃連步接官亭壁

妾鄙陽人也女工之外從事詩禮不幸嚴霜下墜泰山其頽飄泊一身所適非偶薰蕕同器情何以堪昨浮家洞庭怒張一帆良人倏為鬼錄吁臣不事二主女不事二夫其奈何哉偶攜稚子來登客亭感時傷心遂成小絕知我者其天乎

故里蕭條一望間此身飄泊歎空還感時有恨無人說

愁斂雙蛾對暮山

景定建康志

宋詩紀事卷八十七

欽定四庫全書

宋詩紀事卷八十八

錢塘厲鶚撰

張繼常

繼常宋初入內都知為鎮戎軍鈐轄

題鎮戎軍廳壁

夜聞磧外鈴聲苦曉聽城頭畫角哀不是感恩心似鐵

誰人肯向此間來

楊文公談苑

裴愈

愈字益之真宗朝內臣奉命江南搜訪遺書名
畫歸奏稱旨用是累居三館以聞識自任

句

東吳山色家家月南楚江聲浦浦風

送魯秀才南遊

楊柳影疎

秋霽雨梧桐葉墜夕陽天

聞蟬

皇朝類苑

裴湘

湘字楚老愈之子仁宗朝內臣有肯堂集

賦得和氣致祥應詔

君德承天道，沖融協太和。卿雲呈瑞早，膏澤應時多。煦
集連枝本，嘉扶異穎禾。五星還聚井，丹鳳更巢阿。數澤
無遺士，邊防久息戈。黔黎逢至化，稽首載賡歌。

青箱雜記：明道中，仁宗御便殿，試進士詩賦，亦
命湘賦之數刻而成。仁宗嗟賞左右中人為之
動色。翰林李公淑序其集云：予嘗嘉河東父子
起銀疉，右貂龍，以屬辭拔其倫，益之三朝侍臣
老不廢學，又課厲二子，使皆有立約已慎履如
周仁石慶而楚老孳孳嗜書，克自淬琢云。

岑宗旦

宗旦字子文，開封人。仁宗朝，以父遺表通籍壁。

門終九品官善行書有漢唐十一人書評

宣和書譜宗旦趣尚高遠不為苟合取容于世
年十七棄官遊東山水間暮年一無嗜好寄
傲親朋間畧不為身後計得酒輒醉酣長哦揮
灑以為真樂

聽琴詩

琴中太古意方外無為心彈之道頗散不彈理彌深所
以陶元亮何須弦上音

宣和書譜

王紳

紳元豐初內官效王建作宮詞百首以獻

太皇太后生日詩

太皇生日最尊榮獻壽宮中未五更天子捧觴仍再拜

寶慈侍立到天明


寶慈皇太后宮名

太后幸景靈宮駕前露面雙童女詩

平明彩仗幸琳宮紫府仙童下九重整頓瓏璵時駐馬

畫工闇地貌真容

以上溫公續詩話



宋詩紀事卷八十八

欽定四庫全書

集部

宋詩紀事卷

八十九
九十

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣朱圻

謄錄監生臣曹錫爵

欽定四庫全書

宋詩紀事卷八十九

錢塘厲鶚撰

張元

元華州人入西夏

容齊三筆西夏義賢之叛其謀皆出于華州士人張元與吳昊而其事本末國史不書比得田書承君集實紀其事云張元吳昊姚嗣宗皆關中人負氣倜儻有縱橫才相與友善嘗薄遊塞上觀峴山川風俗有經畧西鄙意姚題詩崆峒山寺壁范文正公巡邊見之大驚又有踏破賀蘭石掃清西海塵之句張為鸚鵡詩卒章有好著金籠收拾取莫教飛去別人家吳亦有詩將

謁韓范二帥恥自屈不肖往乃磨大石刻詩其上使壯夫拽之于通衢三人從後哭之欲以鼓動二帥既而果召與相見躊躇未用聞張吳徑走西夏范公以急騎追之不及乃表姚入幕府張吳及至夏國夏人以為謀主以抗朝廷連兵十餘年西方至為疲弊職此二人為之時二人家屬羈縻隨州間使謀者矯中國詔釋之人未有知者後乃聞西人臨境作樂迎此二家而去自是邊帥始待士矣張有雪詩吳詩獨不傳觀此數聯可想見其人非池中物也承君所記如此予謂張吳在夏國然後舉事不應韓范作帥日尚猶在關中豈非記其歲時先後不審乎張吳之名正與羌酋二字同蓋非偶然也

雪

五丁仗劍決雲霓直取銀河下帝畿戰死玉龍三十萬
敗鱗風卷滿天飛

西清詩話華州狂子張元天聖間坐累終身每
託興吟詠如雪詩云云又白鷹云有心待擗月
中兔更向白雲頭上飛怪謫類是

劉三澥

三澥河間人遼駙馬都尉慶歷中奔宋遣歸殺
之

自陳詩

雖慙涪勾赴滄溟仰訴丹衷不為名寅分星辰將降禍
允方疆寓即交兵春秋大義惟觀釁王者雄師但有征
救得燕民歸舊主免于異國自稱兄

儒林公議契丹既有幽薊及雁門以北亦開舉
選以收士人幽州劉氏昆弟其名曰二元三墩
四端五常六符皆在被過三墩四端復尚主慶
歷年秋三墩攜嬖妾偕一子投廣信軍詞情悲
切自言主亮狠必欲殺其妾與子故歸朝廷頗
詢其國中機事復為詩以自陳朝廷以誓約既
久恐納之生釁敵又移文邊郡躡知三墩未還
求索峻切期于必得不然則舉兵襲好矣朝廷
乃遣還三墩復由西山路入定州境所至以金
賂村民求宿食勢亦窘迫定帥遣人搜索拘送

比三叔至幽州其妻已先在矣乃殺其妾與子
械送三叔以其弟弟皆方委仕遂貸三叔死使人
監錮之

遠史劉慎行累遷至北府宰相子六人一德二
元三叔四瑞五常六符叔端符皆第進士叔端
俱尚主為駙馬都尉三叔獻聖宗一矢斃雙鹿
賦上嘉其瞻麗與公主不諧奔宋歸殺之

韓璘

璘金人紹興中歸宋不果遇害

題扇寄弟

嗶嗶鳴雁落江濱夢裏年來相見頻吟盡楚辭招不得

夕陽愁殺倚樓人

四朝聞見錄司馬文季使北不屈在北生子名
通國字武子蓋本蘇武之意通國有大志嘗結
北方之豪韓玉舉事未得要領紹興初玉挈家
而南授江淮都督府計議軍事其兄璘在北亦
與通國善癸未九月以扇寄玉詩云云都督張
魏公見此詩甲申春遣侯澤往大梁諷璘通國
等至亳州為邏者所獲通國璘與常所與交聶
山等三百餘口同日遇害是歲三月十六日也

宋詩紀事卷八十九